

太上九真妙戒金錄度命拔罪妙經

爾時

元始天尊在九清妙境三元宮中 御三炁之華寶雲玉座 騫林之下
與諸大聖 太上道君 太上老君 九皇上真 飛天大聖 妙行真人
四司五帝 天龍神鬼 無鞅數眾 一時同會劫仞寶臺 十方來眾
皆駕五色瓊輪 八景琅輿 玄靈翠節 飛雲素蓋 麟駕羽軒 龍旂
鳳葆 獅子白鶴 嘯歌邕邕 燒香散花 遊空飛步 誦詠洞章 朝
讚天尊 總校圖籙 拔度諸苦 時三元上宮光明照耀 洞朗太空
靈都紫微 輝映十方 下及無極境界 長夜九幽地獄之中 善惡命
根 光中煥然 一切玄司 無不照耀 一一天宮皆見
元始天尊與諸大眾敷弘至妙 開化人天 標記善功 注名黃錄 金
格玉簡 陳列三清 一一地獄之中皆見 十方救苦天尊入於九幽
拔度諸苦 敕命北帝三官九府 百二十曹 五帝考官 察命童子
司命司錄 司功司殺 土皇九壘 及四明公賓友僚屬 五嶽掾吏
執罰神兵 巨天力士 天驕甲卒 牛頭獄吏 威劍神王 三界大魔
九億鬼王 皆集九幽地獄之中 同稟教戒

太上九真妙戒金錄度命拔罪妙經

清微藏書閣

爾時

酆都北帝及諸鬼官 咸皆震悚 各作是念 我等積罪 身為鬼官
統御冥司 常居黑暗 動經億劫 不見光明 今日何緣 忽感上聖
威光朗耀 普照重昏 欲有啟問 懷疑未敢 爾時 普掠獄中
有諸罪人 名入黑簿 牛頭獄卒驅上刀山 皆悉身首爛壞 五體零
落 其中獨有一人 循山上下 逐樹高低 履鋒踐刃 無一傷損
所有刀戟 變成蓮花 爾時 北帝心大驚怖 稽首禮謝 上白天
尊 弟子先緣不幸 身任冥司 自處酆都 已經億載 屢見罪人受
諸苦惱

亦見 東方風雷之獄 常有黑風 震雷霹靂 飛戈飄戟 衝突
罪人 分散肢體 穿穴五臟 萬劫受苦 不捨晝夜 又見南方火翳
之獄 有諸罪人 吞火食炭 為火所燒 頭面焦燎 頭戴火山 皮
膚骨肉 節節生火 萬劫受苦 不捨晝夜
又見 西方金剛之獄 有諸罪人 金鎚鐵杖 亂拷無數 肢體
爛壞 筋骨零落 鐵叉穿腹 金鎚塞心 萬劫受苦 不捨晝夜
又見 北方冥冷之獄 有諸罪人 沈沒丘寒之池 冰戟霜刃

衝斷筋骨 百毒之汁 以灌其上 五體零落 心腹破壞 萬劫受苦
不捨晝夜

又見 中央普掠之獄 有諸罪人 身被拷掠 痛毒難忍 斷筋
流血 悶絕擲地 於是 獄卒方以鐵叉又刺 令諸罪人各各巡上刀
山劍樹 八達交風 吹樹低昂 足履刀山 掛身劍鏢 萬劫受苦
不捨晝夜

又見 東南方銅柱之獄 有諸罪人 身上銅柱 大火猛焰 令
諸 罪人手抱足登 表裏焦爛 腹背膿潰 萬劫受苦 不捨晝夜
又見 西南方屠割之獄 有諸罪人 身被倒懸 刀劍割體 四
肢筋脈 皮膚五臟 皆有刀刀割切其中 罪人血流滿地 非可堪忍
萬劫受苦 不捨晝夜

又見 西北方火車之獄 有諸罪人 五車裂體 四肢分散 或
身處火車 東西南北一一車輪 皆有刀刀隨輪運轉 割切罪人 加
諸猛火 燒炙焦爛 萬劫受苦 不捨晝夜
又見 東北方鑊湯之獄 有諸罪人 身被鐵叉 又入鑊湯 五
體煮漬 四肢潰爛 膿血臭穢 不可堪忍 萬劫受苦 不捨晝夜

太上九真妙戒金錄度命技罪妙經

清微藏書閣

未審今此罪人 以何因緣 循上刀山劍樹 了無傷損 刀戟鋒刃
變成蓮花 相好端嚴 獨步無畏 眾苦所加 莫能害者 忽感上聖
迴駕 天真降集 一切震懼 莫能所知 惟願
天尊大慈大悲 普濟普度 令諸九幽受苦眾生 拔除眾罪 自識宿
命 捨惡從善 得出九幽 身處光明 輪轉福報 長得解脫 永離
三塗

爾時 九幽地獄眾生 聞是北帝廣為啟請 心生悔過 願求拔
罪 舉聲悲叫 響振梵天 於是十方救苦天尊大悲觀心 普及一切
度身威光 假六通慧 令諸罪人閉目靜思 俄頃之間 自識宿命
各各明了生存之日造諸惡業 或手弑君父 不孝二親 或誹謗大
道 背真就偽 或殘傷兄弟 謀反師尊 或六親通同 淫犯骨肉
或為劫賊 殺害人命 或屠割眾生 自饒一身 或以彊凌弱 以貴
虐賤 或浮好三寶 執心不專 或輕慢法師 穢賤靈文 或心懷陰
賊 安忍嫉妬 或惡口兩舌 鬥亂善人 或殺生淫祀 裸露三光
或心生 或口語 或自作 或教他 積劫以來 所有諸罪 一時頓
憶 各各明了 倍增悲惱 願求解脫

天尊普告四眾 汝等諦聽 此諸罪人 曠劫已來 不信經教 惟罪是修 惡惡相牽 過滿罪定 遂使名書惡簿 身沒九幽 淪滯三塗 未應解脫 賴於其中有此一人 生存之時 曾立九幽大齋 受持金籙白簡九真妙戒 標名金格 列字玉清 德重功高 感通上界 我以神力隨念救護 今當普宣禁戒 絕諸惡根 咸使汝等一時解脫 爾時 北帝聞是說已 心大歡喜 不勝踴躍 瞻仰尊顏 而作頌曰


善哉元始尊 眾生慈父母 傾光紫微宮 曲映九幽戶
峨峨丘寒庭 迴照廓冰浦 炎炎烈火燄 霈然灑法雨
圓通大哀智 常善濟眾苦 拔度長夜魂 今得稽首禮

爾時 北帝說是頌已 諸天大眾同聲稱善 鈞天伎樂 萬種互作 幢蓋香花 蔭覆一切 於是 汝等諦聽 靜念在心 吾當為汝顯說 九真妙戒 金籙白簡 受持功德 拔難濟苦 神力難思 眾靈稽首 伏受教命 天尊告曰

太上九真妙戒金籙度命技罪妙經

清微藏書閣

一者克勤	忠於君主	二者敬讓	孝養父母
三者不殺	慈救眾生	四者不淫	正身處物
五者不盜	推義損己	六者不嗔	兇怒凌人
七者不詐	諂賊害善	八者不憍	傲忽至真
九者不二	奉戒專一		



元始符命金籙白簡救苦真符

告下 十方無極世界 三官九府 百二十曹 五帝考官 九幽地獄 巨天力士 執領神兵 司錄司命 司功司殺 牛頭獄卒 三界大魔 拔度亡過某靈魂出離地獄 永辭長夜 睹見光明 萬罪蕩除 冤仇和釋 承此九真妙戒拔度功德 上生天堂 一如告命 風火驛傳

太歲年某月某朔某日齋壇告下



元始符命金錄白簡長生靈符

告下 南方丹天世界 朱陵火府 南昌上宮長生大君 韓君司馬

司命司錄 延壽益算度厄尊神 迴骸起死監生大神 超度亡過 某

靈魂上登朱宮流火之庭 玉眸煉質 黃華蕩形 書名紫冊 受化更

生 承此金錄度命功德 時刻昇遷 一如告命 風火驛傳

太歲年某月某朔某日 齋壇告下

汝等若能受持金錄白簡九真妙戒長生靈符 救苦真符 當消九幽

大罪 標名九宮 察命童子 護戒威神 五帝直符 六宮掾吏 自

當隨逐簡文 覆護受戒弟子

天尊又曰 若有國土兵 災不息 疫毒流行 是其國主后妃太子王

公及以兆庶 亦當修設九幽大齋 各各受持九真妙戒金錄寶符 兵

災靜息 妖惡自屏 天人稱悅 忻國太平 若在山林曠野 為虎狼

猛獸之所奔突 便當寧心存思 金簡靈符 察命童子 受戒法師

太上九真妙戒金錄度命技罪妙經

清微藏書閣

護法神王 猛獸自退 終不害己 若入大海遭遇惡風 亦當存念

風浪靜息 得達於岸 若在軍陣白刃之中 亦當存念 兵仗伏匿

不有害傷 若在牢獄枷鎖之中 亦當存念 冤枉自伸 必得解脫

若為邪精鬼賊眾苦所纏 亦當存念 鬼魅消滅 自然痊愈 若人命

過應入九幽 名書黑簿 夫妻男女門人同學 當為亡人立九幽大齋

書名白簡 為受九真妙戒 燒除黑簿 彼諸罪人 應時解脫 魂

昇九天 因緣輪轉 得為九宮真人天尊 又曰 金錄妙戒長生

靈符 威禁至重 若能如法修行 其福無量 若復有人起心誹謗

生輕慢想 當知此人積惡萬劫 罪障深重 名書惡簿 身沒鬼官

命過之後 必當淪陷九幽地獄 備受諸苦 綿綿長夜 不可解脫

設復有人初雖信受 後起慢心 察命童子 奏上三官 削除金簡

注名死錄 或在見世身受惡病 蟲癩癰疽 人所棄擲 求生不得

求死不得 憂惱自煎 無由解脫 或復長被橫惡所加 或犯王法

或犯刀兵 或犯虎狼 或犯水火 或犯惡人口舌咒詛 室家不和

門族起爭 冤家牽引 一失真道 長淪惡趣 是故汝等依科遵奉

勿生異念 宣告男女 咸使聞知 是時

北帝及諸四眾九幽罪人 聞是說已 心開悟解 各生善念 眾苦消
釋 身心泰然 皆發道意 性不退轉 是時九幽黑簿 一時焚燼
火山息燄 冰池靜波 吞火食炭 化為甘露 金鎚鐵杖 變成蓮花
飛空步虛而作頌曰
稽首無上道 歸心元始尊 至真妙應主 開化飛玄門
妙戒怡五靈 金書警萬神 察命定錄籍 靈符度苦魂
乘雲朝玉帝 齊契玄中人

太上九真妙戒金錄度命技罪妙經竟

天運壬辰年酉月正一天師清微弟子洪鼎堅羅大英恭錄彙編

鞠昕延複校

太上九真妙戒金錄度命技罪妙經

清微藏書閣